

NACRT

Na osnovu člana 8.stav 2. alineja 28. Zakona o principima lokalne samouprave („Službene novine Federacije BiH“, broj : 49/06), člana 4 i 11 zakona o prekršajima i člana 24. stav 1. tačka 2. Statuta općine Cazin („Službene novine općine Cazin“, broj: 13/10), Općinsko vijeće općine Cazin na _____ sjednici održanoj dana _____ godine, donijelo je

ODLUKU O DRŽANJU I ZAŠTITI DOMAĆIH ŽIVOTINJA I KUĆNIH LJUBIMACA NA PODRUČJU OPĆINE CAZIN

I - OPĆE ODREDBE

Član 1.

Ovom odlukom propisuju se uslovi i način držanja domaćih životinja i kućnih ljubimaca koji nisu namijenjeni prodaji; kontrola razmnožavanja kućnih ljubimaca, kretanje pasa u javnim objektima i na javnim površinama, način postupanja sa izgubljenim i napuštenim životinjama, psima i mačkama lutalicama i životinjama opasnim za okolinu, registracija pasa i mačaka, nadzor, takse i kaznene odredbe.

Član 2.

Domaćim životinjama u smislu ove odluke smatraju se :

- kopitari,
- papkari,
- perad

Kućnim ljubimcima u smislu ove odluke smatraju se :

- psi,
- domaće mačke,
- domaće ptice, mali glodari, tetarijske, akvarijske i druge životinje koje se drže za društvo, rekreaciju, zaštitu ili pomoć čovjeku.

Vlasnici pasa i mačaka obavezni su izvršiti registraciju svojih životinja u Općinskom organu uprave – Službi za razvoj i poduzetništvo općine Cazin, te su iste dužni trajno označiti pomoću mikročipa u skladu sa odredbama zakona o zaštiti i dobrobiti životinja i veterinarstvu.

Takse za registraciju pasa i mačaka će se naknadno odrediti dopunom Odluke o Općinskim administrativnim taksama i tarifi Općinskih administrativnih taksa.

Izgubljena životinja je ona životinja koja je napustila vlasnika bez njegove volje i on je traži.

Napuštena životinja je kućna životinja koju je vlasnik svjesno napustio.

Psi i mačke lualice u smislu ove odluke su neregistrirane i neoznačene životinje o kojima se niko ne brine i koje bez nadzora lutaju ulicama i drugim javnim površinama.

Član 3.

Držalac životinje u smislu ove odluke smatra se svako fizičko ili pravno lice koje je vlasnik životinje, ili koje je stalno ili povremeno odgovorno ili zaduženo za životinju.

Držalac životinje u smislu ove odluke ne može biti lice mlađe od 18 godina.

Držaoci životinja dužni su brinuti se o njihovom zdravlju, ishrani, smještaju, higijeni i prema njima postupati u skladu sa Zakonom i drugim propisima o zaštiti i dobrobiti životinja, veterinarstvu, zaštiti okoliša, javnom redu i miru, te odredbama ove Odluke.

II - USLOVI ZA DRŽANJE DOMAĆIH ŽIVOTINJA

Član 4.

Dozvoljava se držanje peradi u domaćinstvima na području općine, uz odgovarajuće sanitarno higijenske uslove prostora u kojem boravi.

Perad se mora držati u dvorištima u posebnom objektu koji mora biti udaljen od susjednih stambenih ili poslovnih objekata i javnih puteva najmanje 5 m, a od objekata za snabdijevanje vodom (bunara, čatrnja, javnih česmi i slično) najmanje 20 m.

Na užem području grada i gušće naseljenim mjestima prostor u kojem boravi perad mora da bude ograđen adekvatnom ogradom koja sprječava nekontrolisano kretanje životinja.

Prostor za odlaganje i zbrinjavanje đubra mora da bude udaljen od susjednih stambenih ili poslovnih objekata najmanje 10 m i izgrađen na način da se spriječi zagađivanje okoline.

Član 5.

Dozvoljava se uzgajanje i držanje kopitara i papkara na užem području grada, uz odgovarajuće sanitarno – higijenske uslove prostora u kojem borave.

Na širim područjima grada i ostalom dijelu općine dozvoljava se držanje kopitara i papkara pod uslovom da domaćinstva imaju u dvorištu poseban objekat za smještaj životinja, koji mora biti udaljen od susjednih stambenih ili poslovnih objekata i javnih puteva najmanje 5 m, a od objekata za snabdijevanje vodom (bunara, čatrnja, javnih česmi i slično) najmanje 20 m.

Prostor za odlaganje i zbrinjavanje đubra i osoke mora da bude udaljen od susjednih stambenih ili poslovnih objekata najmanje 10 m i izgrađen na način da se spriječi zagađivanje okoline.

III - USLOVI I NAČIN DRŽANJA KUĆNIH LJUBIMACA

Član 6.

Držanje kućnih ljubimaca na području općine se dozvoljava uz obezbjeđenje osnovnih sanitarno – higijenskih uslova i na način da se ne remeti javni red i mir.

Držanje kućnih ljubimaca uz uslove iz stava 1. ovog člana u zajedničkim stambenim zgradama, odnosno zajedničkim prostorima unutar i van zgrade dozvoljeno je uz suglasnost svih suvlasnika (vlasnika pojedinih stambeno – poslovnih prostora) i na način da se ne remeti kućni red u zgradi.

Član 7.

U gradskom području i na gušće naseljenim mjestima na području općine zabranjuje se držanje većeg broja pasa (tri i više).

U porodičnoj kući ili dvorištu porodične kuće dozvoljeno je držati pse i mačke na način da ne ometaju red i mir građana.

Pas koji se drži u neograđenom dvorištu mora biti vezan lancem na način da ne ometa kretanje i sigurnost građana ili mora biti smješten u boks koji će spriječiti nekontrolisano kretanje psa.

Držalac ne smije vezati psa na lanac koji je kraći od 3 (tri) metra ili trostruke dužine životinje, mjereno od vrha repa do vrha njuške.

Ukoliko se pas drži u ograđenom prostoru za psa ili kućici za psa, smještaj kućice ili ograđenog prostora mora biti takav da ne ometa stanovanje u susjednom dvorištu.

Pas koji se drži u ograđenom dvorištu ili drugom zemljištu ne mora biti vezan ukoliko ograda visinom i čvrstoćom osigurava sigurnost prolaznika i susjeda, a na ulaznim dvorišnim vratima mora biti na vidnom mjestu ispisana oznaka koja upozorava na psa.

Član 8.

Držaoci opasnih pasa (psi koji prema svojim prirodnim /urođenim sklonostima mogu ispoljavati agresivnost) dužni su iste držati u skladu sa pravilnikom o držanju opasnih životinja (Sl. glasnik BiH, broj : 27/10).

IV- NAČIN KONTROLE RAZMNOŽAVANJA

Član 9.

Držaoci životinja moraju osigurati kontrolu razmnožavanja životinja pod njihovim nadzorom, a za sve potomke svojih životinja snose odgovornost, **te iste trebaju registrirati u nadležnoj službi u roku od 15 (petnaest) dana.**

Držaoci pasa i mačaka moraju spriječiti nekontrolisano razmnožavanje svojih ljubimaca.

Način kontrole razmnožavanja pasa i mačaka mogu biti :

- preventivno djelovanje (kastracija ili sterilizacija),
- kontrola kretanja ženki u vrijeme tjeranja,
- upotreba veterinarskih sredstava,

Poslove preventivnog djelovanja i upotrebe veterinarskih sredstava iz stava 3. ovog člana obavlja nadležna veterinarska organizacija.

V - KRETANJE PASA NA JAVNIM POVRŠINAMA I OBJEKTIMA JAVNE NAMJENE

Član 10.

Držaoci pasa mogu psa izvesti van zatvorenog prostora samo na kratkom povodniku dužine do 3 m.

Opasni psi moraju se voditi na uzici i sa zaštitnom korpom na njušci.

Zabranjeno je pse dovoditi u objekte javne namjene : trgovine, ugostiteljske objekte, banke, tržnice, vozila javnog prevoza, dječija igrališta, kupališta, sportske terene, groblja, javne skupove i slično.

O dozvoli ili zabrani uvođenja psa u hotele, apartmane i druge smještajne i ugostiteljske kapacitete odlučuje vlasnik i to označava postavljanjem naljepnice sa likom psa, odnosno s prekrštenim likom psa na ulazna vrata u objekat.

Član 11.

Ograničenje kretanja pasa ne primjenjuje se na pse osposobljene za pomoć osobama sa posebnim potrebama.

Član 12.

Držalac psa ili mačke dužan je očistiti **svaku** površinu koju je zaprljala njegova životinja na bilo koji način.

Ako pas ili mačka ošteti nečiju imovinu, držalac životinje je dužan izvršiti popravku ili nadoknaditi materijalnu štetu oštećenom fizičkom ili pravnom licu.

Član 13.

Držalac kućnog ljubimca koji se o njemu ne može brinuti dužan je pronaći udomitelja, odnosno udruženje građana ili osobu koja će o njemu brinuti na propisan način ili ga predati skloništu za životinje kada se osnuje u skladu sa zakonom, te snositi troškove boravka do udomljenja ili drugog načina zbrinjavanja životinje.

VI - NAČIN POSTUPANJA SA IZGUBLJENIM I NAPUŠTENIM ŽIVOTINJAMA, PSIMA I MAČKAMA LUTALICAMA

Član 14.

Izgubljene i napuštene životinje skupljaju zaposleni u higijenskom servisu / skloništu za životinje kojeg u skladu sa Zakonom o zaštiti i dobrobiti životinja osnuje fizička ili pravna osoba, općina ili kanton.

Dok tijela predviđena Zakonom ne osnuju higijenski servis / skloništa za životinje, poslove sakupljanja izgubljenih i napuštenih životinja, kao i uklanjanje pasa i mačaka lualica sa javnih površina će obavljati higijeničarska služba u skladu sa Zakonom o veterinarstvu, Zakonom o komunalnim djelatnostima i općinskom Odlukom o komunalnom redu.

Član 15.

Sakupljanje pasa i mačaka mora se obavljati na najprikladniji način u skladu sa važećim zakonskim propisima.

Izgubljene i napuštene životinje će biti vraćene držaocima uz naplatu troškova njihovog pronalaska i vraćanja držaocu.

Član 16.

Zabranjeno je životinju bez opravdanog razloga ubiti, nanositi joj bol, patnju i štetu, mučiti je i namjerno izlagati stresu i strahu.

Član 17.

Usmrćivanje životinje može se provesti ako :

- je potrebno radi održavanja prirodne ravnoteže u lovištu u skladu sa zakonom o zaštiti i dobrobiti životinja i zakona o lovstvu,
- se odvija u okviru mjera za uništavanje štetočina (pasa i mačaka) koje se nekontrolisano kreću po lovištu.

Član 18.

Veterinar odlučuje o usmrćivanju životinja :

- koje boluju od neizlječive i / ili zarazne bolesti, posebno one koja može ugroziti ljude,
- su opasne za okolinu,
- su u agoniji.

Usmrćivanje se vrši u skladu sa Zakonom o zaštiti i dobrobiti životinja.

Ako se radi o kućnom ljubimcu, troškove snosi držalac, a ako se radi o psima i mačkama lualicama troškovi padaju na teret budžeta općine i finansiraju se iz sredstava namijenjenih za obavljanje djelatnosti zajedničke komunalne potrošnje u skladu sa zakonom.

VII - NADZOR

Član 19.

Komunalni redari i komunalni inspektori općine Cazin vrše nadzor nad provođenjem odredaba člana 2. stav 3, člana 4, 5, 6, 7. stav 1., člana 10. stav 1, 3 i 4 i člana 12. stav 1. ove Odluke.

Pripadnici MUP - a USK – a, Druga policijska uprava – Policijska stanica Cazin u skladu sa svojim ovlaštenjima vrše nadzor u slučajevima kršenja odredaba ove Odluke koje su uređene Zakonom o javnom redu i miru i Odlukom o javnom redu i miru.

Veterinarska inspekcija u skladu sa svojim ovlaštenjima vrši nadzor u slučajevima kršenja odredaba ove Odluke koje su uređene Zakonom o veterinarstvu i Zakonom o zaštiti i dobrobiti životinja.

VIII - KAZNENE ODREDBE

Član 20.

Novčanom kaznom od 20,00 – 4.000,00 KM, kaznit će se za prekršaj fizičko lice, ako postupi protivno ili se ne pridržava odredaba iz člana 2. stav 3.

Novčanom kaznom od 500,00 – 7.000,00 KM, kaznit će se za prekršaj pravno lice, ako postupi protivno ili se ne pridržava odredaba iz člana 2. stav 3.

Novčanom kaznom od 50,00 – 2.000,00 KM, kaznit će se za prekršaj odgovorno lice u pravnom licu, ako postupi protivno ili se ne pridržava odredaba iz člana 2. stav 3.

Član 21.

Novčanom kaznom od 1.000,00 – 4.000,00 KM, kaznit će se za prekršaj pravno lice, ako postupi protivno ili se ne pridržava odredaba iz člana: 4, 5, 6. i 7. stav 1.

Novčanom kaznom od 200,00 – 800,00 KM, za prekršaje iz ovog člana kaznit će se i odgovorno lice u pravnom licu.

Član 22.

Novčanom kaznom od 200,00 – 1.000,00 KM, kaznit će se za prekršaj pravno lice, ako postupi protivno ili se ne pridržava odredaba iz člana: 10.stav 1, 3 i 4. i člana 12.stav 1.

Novčanom kaznom od 40,00 – 200,00 KM, za prekršaje iz ovog član kaznit će se i odgovorno lice u pravnom licu.

Član 23.

Novčanom kaznom od 500,00 – 1.500,00 KM, kaznit će se za prekršaj obrtnik ako postupi protivno ili se ne pridržava odredaba iz člana: 4, 5, 6. i 7. stav 1.

Novčanom kaznom od 100,00 – 300,00 KM, kaznit će se za prekršaj obrtnik ako postupi protivno ili se ne pridržava odredaba iz člana: : 10.stav 1, 3 i 4. i člana 12.stav 1.

Član 24.

Novčanom kaznom od 300,00 – 1.000,00 KM, kaznit će se za prekršaj fizičko lice ako postupi protivno ili se ne pridržava odredaba iz člana: 4, 5, 6. i 7. stav 1.

Novčanom kaznom od 40,00 – 200,00 KM, kaznit će se za prekršaj fizičko lice ako postupi protivno ili se ne pridržava odredaba iz člana: 10.stav 1, 3 i 4. i člana 12.stav 1.

XI - PRELAZNE I ZAVRŠNE ODREDBE

Član 25.

Danom stupanja na snagu ove Odluke prestaju da važe ranije donešeni propisi kojima je regulisana ova problematika.

Ova Odluka stupa na snagu osmog dana od dana od dana objavljivanja u Službenom glasniku općine Cazin.

Broj : _____ /12
Datum, _____ 2012.god.

PREDSJEDAVAJUĆI VIJEĆA